

書

經

注

書經注卷之二

金履祥

夏書

禹貢

夏史敘禹平水土之功總以貢名識其成也每州有賦有貢有篋而貢則夏后氏田賦之總名也故以爲名禹貢敘水土之事在唐虞之際禹謨敘功之事則在有虞之時舊皆名夏書以夏史之所述也夫子定書升禹謨於虞書以著三聖相傳之道也知禹貢於夏書以明大禹有天下之本也

禹敷土隨山刊木奠高山大川

敷如敷治之敷有布置周徧之義禹治九州非一手足之爲烈亦布置規畫之有道耳隨山刊木禹功之始奠高山大川禹功之終其始洪水泛濫草木繁興禽獸逼人種藝無地禹於是隨山刊木使益掌火烈山澤而焚之奏庶鮮食且使民居高種藝以給粒食又以升高望遠規畫疏導其後懷襄之患悉定則又定其高山大川以爲每州表鎮望祀之典焉此禹功之終也又古者州域旣廣國小而多地無定名凡禹貢所

書山川皆因山以名其地非謂專導其山也此
讀禹貢之凡例今表見於此云

冀州

冀爲帝都故爲九州之首不言所至春秋王者
無外之義也九州豫爲中帝畿實跨冀豫然自
唐虞都冀天下遂指冀爲中州如楚詞謂中州
爲冀州是也聲教自冀四達則自冀以北所及
固廣矣此異日并幽所以分也冀之爲州三面
皆河水患特甚蓋河自崑崙東北流阻陰山一
帶則折而南流爲冀西河至華陰又折而東流

爲冀南河至大伾折而北流爲冀東河自西河
出孟門之上南河壅砥柱之西東河旋於大陸
之野此冀州水患所以爲甚也而兗在冀東又
爲下流之衝故先冀而及兗自禹載壺口治梁
岐闢龍門疏砥柱豬大陸而冀之患息播爲九
河使之北流醜爲濼潔使之東殺通于淮泗使
之南泄於是兗之患平而青徐次第皆平矣冀
州之境今之河東燕雲遼西河北西路皆是
既載壺口

載始事也壺口山名在今慈州吉鄉縣冀雍之

交夾河而南皆山也壺口蓋受河之口龍門則河南出之門也

治梁及岐

梁呂梁山也在今石州離石縣北呂不韋謂呂梁未闢河出孟門之上春秋梁山崩傳謂壅河三日不流水經注謂呂梁之山巖層岫紆澗曲崖深巨石崇竦壁立于仞河流激盪震天動地蓋大禹所闢以通河也孟門亦在石州今有孟門關岐狐岐山也在今汾州介休縣勝水所出統爲西山古河逕之險阨治二山以廣河道也

舊說雍之梁岐者非九州凡山之言治者或水道之衝有䟽闢之功也或表山以該水土也言藝者剪其蒨鬱與民種藝也傳所謂以啟山林也言旅者祭之以爲其州之鎮望記所謂民所瞻仰取材出雲爲雨者也

既修太原至于岳陽

修治也記曰禹能修鯀之功蔡氏謂因其舊而修之也太原在今太原府榆次縣鄭漁仲謂乃今平定軍按平定軍亦本以太原府廣陽樂平二縣置爾雅高平曰原河東視天下最高率多

山險今太原府亦險阻但榆次與平定諸處爲高平爾岳卽太岳今晉州霍邑縣霍太山也山南曰陽今晉州岳陽縣也汾水出太原諸山經晉州蔡氏謂此條爲治汾水而言然禹經理水土濬畎澮畫井疆物土宜凡事蓋竝手皆作不獨汾也

覃懷底績至于衡漳

覃大也懷地名太行爲河北脊其山脊諸州皆山險至太行山盡頭始平廣田皆腴美俗謂小江南古所謂覃懷也卽今懷州其地亦有懷水

入河衡漳卽今漳河有兩源其一出今平定軍樂平縣少山者曰清漳其一出潞州長子縣發包山者曰濁漳沈存中謂凡二水合流而有文者皆名漳酈道元以濁漳爲衡水以清漳東南流而濁漳橫入之也按唐志冀州以衡水名縣而漳水在縣治之南一里洺州舊清漳名縣而其地有衡漳濱則非二名也漳河本入河自河徙之後漳自至今滄州清池縣入海唐時有請以漳水備四瀆者以其獨達于海也

禹治冀州載壺口治梁岐則冀西河患息修太

原至岳陽則冀之中郊甸治覃懷底績至衡漳則冀之東南水土平至於恆衛島夷則冀之東北皆可知矣此神禹治冀之次第也

厥土惟白壤

此辨地也白其色也無塊曰壤言其性也顏師古謂柔土曰壤周官大師徒辨十有二壤之名物而知其種以教稼穡樹藝而草人又有糞種之法亦因其色性而各異傳所謂先王物土之宜而制其利者也先王辨地教民不失其宜故五穀熟而民人育

厥賦惟上上錯厥田惟中中

賦者田所出穀米兵車皆是也禹貢田賦上中下三分而三之中又三之爲九等以人功之多寡也其實則皆什一諸州先田而後賦以賦之出於田也冀州先賦而後田以賦之不專出於田也冀爲帝都地大人衆天子所自治鄉遂正軍羨卒必雄於外服粟米黍稷併與漆林雜物竝征之亦不別立貢篚總其數之入爲九州第一但聖人取民不盡其力又有時錯出於次等河東太行地勢全體皆石土戴其上但壤性

柔細故其地爲九州第五

恆衛旣從大陸旣作

恆水名出恆岳之北谷合于滹而入易衛出真定府靈壽縣古入河今合于滹沱古書謂舜分衛水以北爲并州又按滹沱河出恆岳諸谷而衛水與之合流恐恆衛旣從卽滹沱爲是大陸爾雅在九藪之數今邢州鉅鹿猶有廣河澤唐杜佑李吉父謂今邢趙深三州皆大陸之土按地說大河東北流過滹水千里至大陸爲地腹蓋古河本穿西山之麓以北流旣出枯滹西山

勢斷地勢平廣脊上諸水鍾匯於此爲蔽河水
泛溢又盤徊其間是爲大陸沈存中爲大陸皆
濁泥所埋今爲平土矣又按禹貢諸州山澤地
水皆敘厥田之上貢篚包匭皆敘田賦之下末
惟言入都水道耳冀爲帝都不別出貢篚固矣
而恆衛大陸復敘於田賦之下何也此非治水
施功之例亦言入都水道因以見其成功爾蓋
冀爲帝都而自平陽四達甸服之外東北最遠
又限以太行之脊其北境侯采則自衛入河其
東偏則自大陸入河其東北島夷則自碣石入

河也

島夷皮服夾右碣石入于河

島夷海島之夷冀東北邊之國如遼遼朝鮮之地不附庸于青而徑屬于冀者也其貢皮服爾雅所謂東北方之文皮者夾旁行也右碣石負海之山也碣石有二故有左右之名舊以右爲大行山之右非也右碣石在平州石城縣南舊爲大河入海之處今河徙海淪碣石去岸五百里矣其山頂踵皆石頂又有大石如柱世名天橋柱云其左碣石唐通典云在高麗界中

濟河惟兗州

濟古文作洧兗州西北界河東南南跨洧其時黃河北流洧入河而南溢以東又北東入海爾雅所謂洧河之間爲兗州自周定王五年河決而東漢孝文時河決東郡武帝元光中繼決瓠子又決於館陶遂分爲屯氏河元帝時大河分流而屯河塞其後又決於平原而下流與漯一王莽末河遂行漯川洧水亦不復南出後世代有河決之患其後遂行洧水故道則兗州之境土無非河患淪徙之地漢王橫言往者天嘗連雨

東北風海水溢西南出浸數百里九河之地已
爲海所漸則兗州之境北已海淪西又河徒南
則沛湫其川澤源委咸非其舊矣今河北東路
大名開德恩博德濱棣滄永靜京東之沛濮京
西之滑小海以東距于營平皆故兗之地也

九河既道

河至大伾折而北流則兗當其東又地平曠無
高山之限而當河勢之衝禹於是播爲九河以
殺其勢爾雅所謂徒駭太史馬頰覆金胡蘇簡
潔鉤盤鬲津是也言地理者多謂徒駭卽濉圉

在今滄州之清池馬頰鈞盤在今德州之平昌
胡蘇在今滄州之臨津覆釜在今瀛州之樂壽
南津在今滄州之無棣簡卽今大名之間潔在
今滄州之南皮按河自大伾北流過大陸以北
方播爲九而今於魏瀛德棣之間更求其故迹
遠矣據王橫所言大風海溢卽今小海碣石古
河入海之處今在海中五百餘里則九河之地
淪爲小海久矣况自河徙之後經流旣息枝流
尚可尋乎

雷夏旣澤

今濮州雷澤縣西北雷夏陂東西二十里南北十五里計古雷夏必大於今

澼沮會同

晁氏曰爾雅水自河出爲澼沛出爲澼沮有楚音二水河沛之別也然則河遷沛泆則澼沮不可復尋矣說者以爲濮耀二水古入雷澤一說澼卽汜水張明謂禹開陰溝以通河泗許氏謂汜受陰溝至蒙爲澼水東入于泗卽汜水汜今作汴沮卽今澼水首受滎澤過應天今入南溝河近時黃河亦入此路但經稱會同古當合入

沛後世導之入淮入泗爾

桑土既蠶是降丘宅土

究土宜桑後世所謂桑間亦一證也今水平桑長而蠶事興矣究土無山洪水則民居高丘今土平而降丘宅土矣

厥土黑墳

墳謂土性起發也

厥草惟繇厥木惟條

九州土田連舉惟究徐揚三州又入草木一條蓋三州皆東方下流之地洪水泛濫草木不生

至是始繇茂條長也

厥田惟中下厥賦貞作十有三載乃同

田第六賦第九貞字本下下字也古篆凡重字者或於上字下添二尢賦下下篆從下二或誤作正通爲貞又篆文眞字作𠄎與下下相類因以致誤學者不知古文說多不通尢地平下被害特甚水患雖平而水道居多人民鮮少蓋十有三年而治田與賦始同他州

厥貢漆絲厥篚織文

黑鹵之地宜漆桑土宜絲篚者幣帛之類以篚

盛貢之織文者織絲成文也

浮于濟漯達于河

此充入都水道也沛入河而南出故浮沛可以
達河史記禹醜二渠引河其一漯也辭氏謂古
漯自今開德府朝城縣受河而東入海故浮漯
可以達河西漢末河并行漯川其後河徙而漯
亦不復存矣

海岱惟青州

青州於國爲正東故名從東方之色其地東北
跨海西南距岱岱卽泰山是名岱宗在今冀慶

府奉符縣西北三十里其山特起東方爲下上
水口表鎮連延而生諸山北卽原山汶出其西
淄出其東東卽蒙又爲沂水諸源又東濰山濰
水所出西南卽泗水所出青州之地得今青齊
濟南淄濰登萊密東跨海而高麗北跨河而遼
東但小海所淪則青之北境亦非全壤不獨充
州爲然

嶠夷旣畧

首書嶠夷諸州無此例也但青州實跨海而有
東夷兼堯命羲仲宅嶠夷以侯正東之景故特

表於前或云卽今登州之地畧者經畧之也

濰淄其道

濰出今密州莒縣東北濰山至濰州昌邑入海
淄出今濰州川縣東南原山今入北清河

厥土白墳海濱廣斥

濱古文作頰青之土色白而性墳起其海濱之
地則廣大而斥鹵可煮爲鹽故齊有魚鹽之利
今登州千里長沙是其地

厥田惟上下

九州冀田第一青徐卽次之後世所謂秦得百

二齊得十二亦言其地利之饒非獨形勢也百
二十二猶言百倍十倍

厥賦中上

田第三賦第四

厥貢鹽絺海物惟錯岱畎絲枲鉛松怪石萊夷作
牧

鹽廣斥所出絺細葛布也海物非一種皆雜貢
之岱畎太山之谷其所出絲枲麻也鉛黑錫松
太山之名材怪石異石也如今萊之温石可爲
器今青州黑山紅絺石紅黃相參文如林木或

如月暈如山峯如雲霞如花卉卽古怪石也淄川梓桐山石門間石色若青金紋如銅屑理極細密亦奇石但不如紅絲石之堅凡此諸品皆可爲器用今取以爲硯萊夷萊山夷俗地宜畜牧亦取其畜以貢今萊州之東是其地

厥篚檠絲

檠山桑也其絲堅韌宜絃瑟琴故篚以貢之一說通上文謂萊夷貢檠絲蓋今萊人猶謂之山繭云

浮于汶達于濟

汶水出今襲慶府萊蕪縣原山古入洙今入北
清河兗州浮洙達河故青州止書達洙則達河
可知

海岱及淮惟徐州

東至海北至岱南被淮今襲慶泗沂淮陽漣水
海鄆宿西接單陳蔡潁之地

淮沂其乂蒙羽其藝

淮出今唐州桐柏山行千七百里至海州入海
徐之水以沂名者非一其出兗州泗水縣尼丘
山過魯城南入泗者曾點浴沂之沂也今海州

沭陽縣有沂河口者周禮沂流之沂也出沂州
新泰縣艾山西南至淮陽下邳入泗者此沂爲
最大卽禹貢之沂也蒙山在今沂州費縣羽山
在今海州朐山縣藝種藝也淮沂之水旣平則
蒙羽之墟皆可種藝矣

大野旣豬東原底平

大野卽鉅野澤在今濟州鉅野縣唐鉅野屬鄆
州石晉時混於梁山灤鄆今東平府卽東原之
地大野之水旣豬則東原之地底平

厥土赤埴墳草木漸包

埴細而黏若今陶器之泥考工記搏埴老子埴埴是也漸包古文作薪包

厥田惟上中厥賦中中

徐上黏埴而墳起故田視九州爲第二當時生聚人工未及故賦第五

厥貢惟土五色

貢土五色用以立社逸周書曰建太社國中其壝東青土南赤土西白土北驪土中央疊以黃土將建諸侯則鑿取其方面之土包以黃土苴以白茅以爲侯社

羽畎夏翟

羽畎羽山之谷夏五色翟雉也左傳注南方曰翟雉古車服旃旄以雉羽爲飾羽山出夏翟以此得名

嶧陽孤桐

嶧山在兗州鄒縣名鄒嶧山九域志以爲嶧山在淮陽下邳所謂嶧陽者是山南曰陽孤桐者特生之桐也桐性虛時生於山陽則清虛特異貢之以爲琴瑟後世難得則取凡桐之舊者爲之謂桐不百年則木之生氣不盡木生氣盡而

後能與天地陰陽之氣相應也

泗濱浮磬

泗水之濱浮生之石可以爲磬如今硯石之取于石者蓋石根不著巖崖而自特生者故謂之浮今下邳猶有石磬山乃其遺跡又宿州亦有靈壁石但浮生者不可得耳

淮夷蠙珠暨魚

淮出唐州其百餘里內尚淺而多潭有蠙珠潭今其地凡十四潭而不復生珠矣魚卽淮白魚若蠙珠玉磬古今風氣不同蓋不常有

厥篚玄纁縞

玄黑赤色沈括謂今深紫類阜者是古人以爲
上衣纁黑經白縞者縞素縞也記有虞氏縞衣
而養老又古者祥而縞素禫而纁

浮于淮泗達于河

古文尚書作達于荷說文引書亦作荷今俗本
誤作河爾泗出兖州泗水縣陪尾山有四源故
謂之泗荷澤與沛水相通而泗水上可以通荷
下可入淮徐州浮淮入泗自泗達荷青州書達
于沛則達河可知故徐州書達于荷則達沛可

知河沛泗淮在古必有相遇之道禹所以殺河
流使之可以南繼通南北使之可以朝貢灌輸
後世河徙而南會于荷澤匯于鉅野分爲南清
河并行于泗以入淮蓋亦其故道也

淮海惟揚州

北至淮東南至海得今淮南江南東西一浙之
地福建廣東亦屬焉

彭蠡既豬陽鳥攸居

彭蠡今鄱陽湖自洪宮寧安江四嶺北江東諸
水在江饒南康興國之閩至鄱州湖口入江流

志所謂湖漢水九者卽是也禹豬彭蠡廢其旁地爲蘆葦以備浸淫故陽鳥居之陽鳥雁也如漢築河隄去河各二十五里以防泛濫其後民頗居作其間故河水漲溢之時動則漂沒以此知神禹廢彭蠡之濱以居陽鳥其爲防患之意蓋深

三江旣入震澤底定

震澤今太湖三江太湖之下三江入海者一說吳松江七十里分流爲三入海中爲松江東南爲東江北爲婁江吳越春秋所謂三江之口是

也一說太湖之下元有三江吳松乃其一陳述
右在浙西嘗尋故道開其一以泄白水之患蓋
後世故道多湮雖松江尚存然亦淺故浙西歲
有白水太湖謂之震澤者震動也今湖翻是也
在今湖州烏程之北北入常州無錫晉陵東入
蘇州吳江縣周回六百五十四里按舊三江之
說不一其可據者一一說謂古名漢爲北江江
爲中江則彭蠡之水爲南江至揚雖已合爲一
然以其三水合流謂之三江猶洞庭九水俱匯
謂之九江也范蠡所謂吳之與越三江環之民

無所移謂俱在大江之南爾今通州福山鎮猶
名三江渡是也然三江旣以彭蠡爲一則上文
旣出彭蠡不應下文又出三江且經文二旣字
對舉皆本效之辭彭蠡旣豬矣則陽鳥攸居三
江旣入矣則震澤底定是三江者乃震澤下流
之三江北方之水河爲大故凡水名皆以河爲
總稱南方之水江爲大故凡水名皆以江爲總
稱然則三江之江不必疑爲大江也今按揚州
之境嶺至郴虔北枝趨敷淺原水皆東流又自
建嶺一枝轉而北趨介衛爲歙嶺巨宣而抵建

康其岡脊以西之水皆西流是俱匯爲彭蠡其
岡脊以東之水南則浙江北則震澤也彭蠡之
水不豬則今江西江東諸州之水爲揚西偏之
患震澤之水不泄則今浙西諸州之水爲揚東
偏之患揚雖北邊淮而於徐已書又雖中貫江
而於荆已書朝宗獨大江之南西偏莫大於彭
蠡東偏莫大於震澤二患旣平則揚之土田皆
治矣故特舉二湖以見揚之告成若其南偏率
是山險浙亦山溪計不勞施功故餘不贅

篠簞旣敷厥草惟夫厥木惟喬

篠箭竹蕩澗箭竹也爾雅東南之美者有會稽之竹箭焉

厥土惟塗泥厥田惟下下厥賦下土上錯

揚江湖之區下流之地其土塗泥而其田反居第九古人尚黍稷田雜五種故雖水潦旱乾而各有所收塗泥之土其田獨宜稻不利他種故第爲最下厥賦第七又有時雜出於七等之上則人功亦稍修矣自唐以來則江淮之田號爲天下最漕餉皆仰給於東南

厥貢惟金三品瑤琨篠簜齒革羽毛惟木島夷卉

服

三品金銀銅也瑤石之美似玉古有瑤爵今瑪
 瑙水晶壽山石皆可為杯器蓋瑤之類現今琨
 山石是篠以為矢筈篋以為管儀禮篋在建鼓
 之間是也齒象齒革犀兕之皮羽翟雉毛旄牛
 尾故為揚貢今嶺海之間有之凡此皆為器服
 車甲旌旗樊纓之飾惟木惟與也木豫章之屬
 島夷梅島之夷卉服草服也如今黃草蕉布之

類

厥篚織貝

博物續志曰閩中多木綿植之數千株採其華
紡以爲布名吉貝南史言林邑等國出吉貝木
薛氏云織貝今木綿也或曰織貝卽島夷所貢
如今南海諸番皆以木綿爲服謂之搭布其細
者則名吉貝

厥包橘柚錫貢

小曰橘大曰柚惟荆揚有之隴淮而北則爲枳
橘頌所謂受命不遷者也沈存中謂本草柚皮
甘今所謂柚其皮極苦而橙皮甘古之柚蓋橙
云錫貢錫命則貢聖人不常以口腹之味擾民

也

沿于江海達于淮泗

徐州已言淮泗達河故此但言達于淮泗

荆及衡陽惟荊州

北抵荆山南跨衡山以南荆山在今襄陽府南
漳縣衡山在今衡州之北九十里屬潭州湘潭
縣荊州得今荆湖南北路北接京西西侵夔峽
南控廣西

江漢朝宗于海

蔡氏曰江漢合流于荆去海尚遠然水道已安

下流無壅奔趨于海猶諸侯朝宗于王也

九江孔殷

九江洞庭也孔殷甚得其中也朱子謂國初胡
祕直近世晁詹事陳冠之皆以九江爲洞庭按
江海經亦云洞庭沅澧之水瀟湘之泉是爲九
江今按禹貢東至于澧過九江則是古者澧先
入江而后九江入也澧當九江數外今考朱子
文集及漢史及江陵新志更定九江源委一曰
瀟江出道州營道縣九疑山亦名營水過零陵
下與湘江合二曰湘江出靜江府興安縣陽海

山東北名鑠觜東北至潭州入洞庭三曰蒸江
出衡州衡陽縣西會衡山諸源而下合于湘以
其水氣特盛故名爲蒸舊說不在九江之數朱
子文集言九江云湖南有蒸湘之屬而記文亦
云蒸湘之會今入于此四曰澧江出武岡軍唐
料山又名邵陵江亦名益陽江至益陽縣西北
入洞庭五曰沅江出沅州西蠻界中至辰州與
酉江今據西漢志則沅水出牂柯郡界故且蘭
縣山東北流二千五百三十里至益陽入洞庭
且蘭今屬播州是與牂柯江隔嶺而分者也六

曰漸江出索縣東流與沅合七曰序江出辰州
澱浦縣鄧梁山西流與沅合八曰辰江出辰州
西南蠻界中東流與酉合九曰酉江出會溪城
西山中至辰州東合沅辰北流至鼎州東入洞
庭此九江也但郴江亦一州之水其源出嶺至
郴城縣始勝舟又五十里與東江合而始大北
入湘江舊皆不在九江之數但不知其與漸序
二水孰爲大小今不敢更有升降已上九江會
爲洞庭計禹時九江入江會合未甚廣故未有
洞庭之名其後漸序日廣方八百里而洞庭山

遂在其中故因山得名今所謂荆湖南北路自是而分

沱潛既道

爾雅江出爲沱漢出爲潛今江陵府松滋縣南枝江縣北江分三十餘所下流復合曰筮籬江公安縣有沱潛港此沱之證也潛出今江陵府潛江縣漢志謂華容有夏水首受江東入沔說者以爲潛水華容今監利縣此卽潛江縣

雲土夢作乂

舊雲夢土作乂太宗得古本尚書改爲江北爲

雲左氏所謂濟江入于雲中沈存中鄭漁仲謂
今監利王沙景陵等處是江南爲夢左氏所謂
田于江南之夢沈鄭謂今公安石首建寧等處
是然二氏之說皆在今江陵府之境但今安德
府有雲夢縣而荆門之長林縣岳州之巴陵縣
亦皆有雲夢司馬相加謂雲夢方八百里其所
連亘困廣楚之藪澤不一後人既以雲夢兼稱
故所在藪澤皆謂雲夢爾又按荊州之地中間
卑濕江漢至此支分沮洳故藪澤爲廣今枝分
爲沱潛者既道則其沮洳爲雲者皆爲平土爲

夢者皆可作又矣

厥土惟塗泥厥田惟下中厥賦上下

荆揚之土皆塗泥性止宜稻故田爲第八視揚
稍高爾今世謂江陵爲魚稻之鄉其餘類此然
而賦入第三以近中土人功修也

厥貢羽毛齒革惟金三品柁榦栝柏

荆貢畧與揚同羽毛齒革所謂利盡南海也金
次于揚而木加焉柁古文作柁爾雅柁一名櫓
郭璞謂材中車輞榦栝也材中弓弩之幹周官
所謂荆之榦是也栝檜也揚止言木荆又備言

羣材

礪砥砮丹

礪砥石可用磨者粗曰礪細曰砥今郢石是也
砮者石可以爲矢鏃今思播有之周初肅慎氏
貢楛矢石砮家語孔子嘗以對陳侯石砮之問
蘇氏謂孔子不近取諸荆梁而遠取之肅慎則
荆梁之不貢此久矣丹朱砂也今辰錦所出光
明砂及溪洞老鴉井所出尤佳

惟箇籥楛三邦底貢厥名

箇籥竹也趙宣子所謂箇籥之勁楛其本堅小

而直陸璣謂葉如荆而赤莖似菁三物皆中矢
筴三邦所貢又爲名材三邦之名不傳考工記
曰妣胡之筴鄭氏謂胡子之國在楚之旁者唐
志零陵貢葛筴蓋此類云

包甌菁茅

菁茅一茅三脊管子謂出江淮之間召陵之
師賁楚貢包茅不入無以縮酒朱子謂古人醑
酒不以絲帛而以編茅王室祭祀之酒則以菁
茅取其至潔包者苴之甌者匝之也劉蕡謂辰
州盧溪縣包茅山一茅三脊今屬麻陽縣然鄂

州山上亦有之祥符東封取諸此

厥篚玄纁璣組

爾雅一染謂之纁再染謂之類三染謂之纁水
工記曰三入爲纁一說謂六入爲玄古人玄衣
纁裳璣珠生於水類玉組辨絲以貫珠以爲冠
纓佩以貫玉帶以爲紐約是三者皆冕服所需
九江納錫大龜

尺有二寸以上謂之大龜龜之神在甲故可以
卜納錫神之也

浮于江沱潛漢逾于洛至于南河

荆之諸國或從江或從沱或從潛以入于漢自漢入丹河白水河卽踰山路入洛達于南河

荆河惟豫州

豫於九州爲中土南跨漢而抵荆山北距南河得今東西南三京潁許汝亳陳曹孟鄭唐隨襄均拱陝虢商鄧諸州之地

伊洛瀍澗旣入于河

世傳禹闢伊闕今河南伊闕縣北兩山相對如門闕伊流出其間北至洛陽縣南入洛洛出熊耳山在商州上洛縣今虢州盧氏縣河南永寧

縣皆有熊耳山邵康節謂當以上洛者爲是灩
水出今河南府河南縣穀城山至堰縣入洛澗
水出河南府澠池縣東北白石山至河南縣入
洛洛至鞏入河

滎波旣豬

滎波孔氏以爲一水周官職方其川滎維其浸
波澁則二水也沛水入河而南出溢爲滎今鄭
川滎澤是其處爾雅水自洛出爲波而山海經
曰婁涿之山波水出其陰北流注于穀二說未
知孰是西漢末沛水不復南溢而滎涸漢明帝

使王景卽築故瀆東注浚儀名浚儀渠

導荷澤被孟諸

荷澤在今曹州沛陰縣孟諸在今應天府虞城縣自荷澤至孟諸凡百四十里二水舊相通今荷澤自分南北清河近時大河亦被孟諸併行澗水矣

厥土惟壤下土墳壚

其上者無塊而柔其下者或膏而起或剛而踈如轘轅之濫淖汜關之沙陷皆所謂下土者

厥田惟中上厥賦錯上中

田第四賦第二雜出第一唐虞甸服跨河而南
故豫之賦與冀相埒計皆上上冀言上上錯豫
言錯上中特異文耳

厥貢漆枲絺紵厥篚織纊錫貢磬錯

紵以爲布纊綿也餘見上磬錯磬玉不可多琢
以錯磨成錯鑄鐵爲之今鏤是有用則錫命而
貢

浮于洛達于河

華陽黑水惟梁州

東北距華山之陽西南抵黑水得今興元成都

潼川夔州四路及松外諸戎東西珥河諸蠻漢
永昌唐姚州今大理之地

岷嶓旣藝

岷山江源嶓冢漢源說見下文岷山之下沃野
千里與漢中俱號天府之士江漢之源旣滌則
岷嶓之墟皆種藝矣

沱潛旣道

沱自今永康軍導江縣大江分流入成都及彭
蜀諸州至新津縣與大江復合此皆沃野灌注
之利也水自漢出爲潛然地志巴郡宕渠縣有

潛水西南入江今渠州流江縣也又漢中安陽縣有潛谷水出西南北入漢今洋州貞符縣也然此潛自指西漢水出秦州清水縣亦名蟠冢山東南流徑西和州南名犀牛江東合于嘉陵江以入江梁州不言江漢以岷嶓沱潛源流之始見之

蔡蒙旅平

蔡山在今雅州嚴道縣南諸葛武侯征南夢周公於此遂立周公廟因以周公名山蒙山在今雅州名山縣東謂之蒙頂山雲霧常蒙其頂上

合下開沫水徑其中出爲濶漣水沫卽大渡河也旅祭也平謂蔡蒙之墟水土皆平也

和夷底嶺

雅州雅道以西地名和川卽青衣水也夷人所居今爲羈縻州有和良和都之名禹之治梁西則導江東則導漢而青衣大渡諸水又在岷山之南以東故禹於蒙山致平者爲大渡河諸水於蔡山和夷致功者爲青衣水諸源也青衣水與大渡河合至今嘉州南岸街衣山下入于岷江青衣蓋叢氏之神也

厥土青黎厥田惟下上厥賦下中三錯

黎細而疎也梁土色青故生物易性疏故散而不實向閭吏牘謂成都土疏難以築城蓋此也
田第七賦第八或七或九

厥貢璆鐵銀鏤著磬熊羆狐狸織皮

梁州產鐵漢書蜀卓氏程氏皆以冶鐵富擬邦君銀白金鏤鋼鐵磬石磬漢於犍爲水濱得古磬十六枚蓋其土人所琢也能羆狐狸四獸其皮可以爲裘其毳可以織爲金罽

西傾因桓是來浮于潛逾于沔入于渭亂于河

西傾雍州山在今洮州臨潭縣西一百八十里洮水出其北入河桓水出其東南今名白水江又一源名墊江出洮及其南壘州岷州階州宕昌諸處東南合嘉陵江以南入江嘉陵江者出大散關嘉陵谷西傾諸國雖隸雍牧而水道則於梁有桓水之可因梁州通都水道或自潛或自沔潛沔於渭無可通之道乃逾山而後可以入渭經當言入于沔逾于渭如上文逾于洛之例今本誤也蓋潛卽西漢水沔卽褒水自江沂嘉陵江而上至大散關一至秦州天水則踰關可

以入渭矣沔水出京兆武功褒中南至褒城縣
褒城鎮入漢斜水亦出武功而北入渭漢時人
上言通漕謂褒絕水至斜間百餘里以車轉從
斜下渭經自沔逾渭不言斜者因大以見小也
由渭入河絕流而渡曰亂

黑水西河惟雍州

西南距黑水東北距西河得今永興秦鳳涇原
環慶鄜坊麟府熙河等路及唐隴西西涼吐蕃
吐谷渾疊宕甘肅瓜沙等地

弱水既西

說見導水

涇屬渭汭

見下文導水涇水出原州百泉縣南流至京兆府南陵縣入渭屬注也

漆沮既從

漆出今同州白水縣卽漢志西洛水或云出西夏界中歷保安縣同之境而入渭沮出今坊州昇平縣北子午嶺與漆水合至同州朝邑縣東南入渭

澧水攸同

澧水出今京兆府鄠縣終南山東北流入渭

荆岐既旅終南惇物至于烏鼠

荆北條荆山在今耀州富平縣岐山在今鳳翔府岐山縣旅定其祭秩也終南在今京兆府南自西傾秦隴連互雍南以至太華故謂之終南惇物在武功烏鼠卽渭源說見下文三山不言所治皆卽山以名其地自東而西舉其起止中間水土之平可見矣

原隰底績至于豬野

原隰詩所謂度其隰原者在今邠州豬野在今

梁州姑臧縣名休屠澤魏太武伐涼謂姑臧城
東西門外湧泉合于城北其大如河其餘溝渠
流入澤中其間乃無燥地澤草茂盛按水土如
此此禹所以底績也

三危既宅三苗丕敘

沙州燉煌縣東四十里有卑兩山一名化兩山
有三峯甚高人以爲三危又巖昌羌卽三苗之
種其地有疊州山多重疊三危山有三重或在
其地戎人凡山有三峯者便指以三危故漢志
西指化兩樊綽又指麗水之山但禹貢卽山以

名地而自唐以來地屬吐蕃難於考定聖人黜
惡以遠爲罰經理則不以遠爲間故於三危之
地亦安定之而三苗之在其地者亦知順序矣
厥土惟黃壤厥田惟上上厥賦中下

黃土之正色而又細柔故厥田爲九州第一後
世號關中爲沃野謂之天府蓋以此也然就其
間較之亦惟涇渭澧漆之區最爲沃壤西邊近
沙磧北邊山狄故禹於雍州自終南至烏鼠則
自東而西自原隰至豬野三危則自內而外賦
出第六生聚蓋不同也雍州之地至戰國秦漢

富庶甲天下漢衰地力耗自唐漸復然不能及
東南至宋朝滋不及然雍冀之非古西以夏北
以契丹也揚州厥田下下而賦下上自唐以來
雖關中亦仰東南之粟至宋朝則軍國之需皆
仰給於東南矣生聚之繁於此爲盛古今地力
風土其不同蓋有由矣

厥貢惟球琳琅玕

球玉可以爲磬琳美玉琅玕青玉雍之西有崑
崙之玉其類非一皆球琳也其東有藍田青玉
蓋琅玕也

浮于積石至于龍門西河會于渭汭

渭爲雍中巨流南則灃北則涇漆沮皆入之至西河爲甚徑但自岍隴以西則皆浮于積石河而下至龍門之上其入于西河者至華陽會于渭汭則浮渭而下者至是會于河可知也朱子按濁水集云邢恕奏乞下熙河路造船五百隻於黃河順流載兵下會州以取興州熙河路漕臣李復奏黃河過會州入葦精山石碛險窄自上垂流直下高數十尺船豈可過至西安州之東大河分六七道散流謂之南山逆流數十里

方再合逆溜水淺灘不勝舟此聲若出必爲夏
人侮笑事遂寢朱子謂浮于積石至于龍門西
河則古來河道固可通舟矣而復之言如此何
也履祥按神禹導水濟川必有通道但天地人
事每亦相因自三代之衰河源皆爲戎狄不通
朝貢至秦并兼而河源亦在長城之外漢武帝
極力開拓僅得河南空無匈奴開朔方始得渠
搜之地受休屠之隆始得豬野之澤然自積石
以下源委未盡得也則故道堙廢其來久矣如
蜀南大渡河自吐蕃界經雅州諸部落至黎州

爲南邊要害之地建隆三年平蜀以地圖來上
太祖皇帝見大渡之南城寨勞遠以玉斧畫河
爲界曰此外吾不有也此後河流忽中陷五六
十丈澎湃如瀑船筏不通名爲噎口蠻人不復
可以窺伺殆天設險以限戎蠻也又如自荆入
蜀素號水險近數十年四川請於荆湖和糴運
米入蜀舟人貫習三峽遂爲安流以此推之李
復所奏河道一則固恐出於吏民之託辭一則
故道久廢岸谷變遷亦恐非復禹迹之舊也
織皮岷嶓析支渠搜西戎卽敘

蘇氏謂此錯簡當在厥貢球琳琅玕之下然雍州西界黑水此諸國又在黑水之外故附於後以織皮冠之者此皆皮服之國貢織皮者也崑崙國名崑崙山旁小國也崑崙無定所而莊騷雜書皆云西王母所居爲是則在今肅州酒泉郡南山石室玉堂珠璣鏤飾尚在事具晉書張駿傳太守馬岌所言是必古崑崙國也今西北別有崑崙都國去中國甚遠析支國名有析支河唐與吐蕃舊界也當在唐北庭金滿縣西漢書西域傳言輪臺以東捷枝渠犂捷枝卽析支

渠犂卽渠搜與然漢武帝開朔方又自有渠搜
縣爲漢北極界今屬夏州西戎班孟堅謂卽西
域

導岍及岐至于荆山逾于河壺口雷首至于太岳
底柱析城至于王屋太行恆山至于碣石入于海
此以下導山也岍岐荆雍山也岍在今隴州吳
山下一名吳岳蓋虞周之世疑以此爲西岳故
又有岳山之名泝水出其西而南入渭汭水出
其北而東入涇岐荆說見雍州壺口而下九山
冀山也禹於帝都所親治導故冀山爲多壺口

太岳碣石說見冀州雷首在今河中府河東縣
雷水出焉山臨大河北去蒲坂三十里底柱在
今陝州陝縣三門鎮大河中流有石如柱世言
禹鑿底柱爲之三門至今爲河流之險唐時又
嘗鑿之不能殺其勢也然三門又分天門地門
人門惟地門不可過耳析城在今澤州陽城縣
山峯四面如城王屋在今孟州西北王屋縣涉
水出焉太行在今懷州之北連亘數州爲河北
脊以接恆岳程子謂太行山千里片石衆山皆
石上起峯爾恆山北岳在今定州之北碣石一

在平州之南一在高麗界中至于碣石入于海
一說謂恆碣之間諸水皆入于海亦通○禹貢
一篇經緯脉絡舉天下山川分載九州北南以
緯之又合爲導山導水西東以經之然後源委
脉絡可指諸掌不爾則散而無統矣導岍而下
鄭王諸儒分爲三條四列條之說導岍而下北
條西傾而下中條嶓冢以下南條也列之說導
岍而下正陰列西傾而下次陰列嶓冢而下次
陽列岷山而下正陽列列之說比條爲密然皆
不離地脉之說就地脉之說論之則西傾嶓冢

岷山三列猶可通導岍而下一列爲不可通蓋
雍之西其山隴自南而北冀之諸山皆又自北
而南今北條陰列所紀乃自西而東此其說之
不可通者也言地理者謂大行西南跨大河與
商虢秦楚諸山相接諸山總在山形之內則北
條逾河之說固有此理然此亦大地全體之常
形爾大抵禹貢所書多是卽山以名其地故導
山之說所以治水土也然隨山刊木禹功之始
而經敘導山又在導水之前而其導山又必自
西而下則聖人之規模次第暨可知矣蓋其治

水之初利在真民擊鮮積食固是一時之急者
然必自西而下者天下山川相爲綱紀必且自
西徂東窮源極委廣覽天下之形勢周知川源
之險阻而後分畫賦功次第而舉故導山乃所
以爲導水計也自其大者言之導岍而下爲河
漆沮涉洛陸也西傾而下爲渭涇灋也爲洛爲
淮泗也嶧冢而下爲漢沔潛三澨也自岷山而
下爲江沱九江彭蠡也自其細而言之則固多
矣如導岍則岍汭可知及岐則杜漆可知至荆
則伊

可知析城則汾洛可知太行則懷

沁淇池國蕩諸水可知恆山則恆衛潞滋易秦
乾可知至碣石則大小遼水可知導西傾則西
黑北洮南桓可知朱圉鳥鼠至于太華則西漢
嘉陵褒斜灞澂可知熊耳外方則丹白波穀伊
潁可知桐柏至于陪尾則汝渦濠泗沂可知導
嶓冢至于荆山則漳沮潛夏可知岷山之陽則
青衣大渡馬湖涪黔江可知至于衡山則九江
諸源至于敷淺原則水之西入洞庭東會彭蠡
者又皆不言可知矣凡此諸說禹蓋兼舉並行
不可以一說斷也

西傾朱圜鳥鼠至于太華熊耳外方桐柏至于陪
尾

西傾至太華雍山也西傾說見梁州一名嶺臺
山謂之西傾則其西地勢反而下水皆西流入
黑水矣自此而東則洮出其北白水江出其南
朱圜山在今秦州伏羌縣一名白巖山太華今
華州熊耳外方桐柏豫山也熊耳見下文外方
舊說嵩山非也嵩高世名中岳安得反謂外方
又與江夏內方相爲內外哉按今河南府伊陽
縣伊闕鎮之西陸渾山據唐志一名方山蓋古

爲外方春秋時秦晉遷陸渾之戎居此因以陸渾名其山其山固高高之聯峯然謂爲高高則非爾桐柏見下文陪尾徐山也泗山陪尾在今襲慶府泗水縣桃虛西北舊說拘於地脉以陪尾卽漢志橫尾山在安州安陸縣今屬信陽軍導嶧冢至于荆山內方至于大別

嶧冢說見梁州其形如冢荆山說見荊州漳水所出舊南入江近世導之東流入諸湖濼合潁江以通漢內方山漢志竟陵縣章山古文以爲內方今荆門軍長林縣也大別山在今嶺陽軍

漢陽縣其形如龍因有小別山漢水至此入江
謂之沔口云

岷山之陽至于衡山過九江至于敷淺原

岷山梁州說見下文山南曰陽蓋岷山一帶南
出爲大渡之源又包青衣以東馬湖江黔江諸
源東山一枝爲衡山其南行而東者爲嶺包滿
湘之原而又一枝北向以至敷淺原故禹自衡
山過洞庭而至敷淺原也敷古文作傅通典註
江州潯陽縣有蒲塘駟前有敷淺原原西有傳
陽山朱子親至其處謂廬山當其地而敷陽山

乃在廬阜之西南則是敷淺原之陽也蓋廬山
雖高而其中原田連亘人民奠居所以有敷淺
原之名後世匡俗結廬居之遂名廬阜而其支
隴林麓猶存舊名爾導山而云過九江則導山
卽所以導水可知

導弱水至於合黎餘波入于流沙

此以下導水蓋總敘之源委泝源而及流卽大
以統細也弱水出吐谷渾界窮石山至甘州張
掖縣合黎山下唐志言自合黎峽口西出卽居
延澤經云至于合黎餘波入于流沙則居延乃

古合黎澤爾水溢則被流沙也雜書言西域使者乘毛車以渡弱淵豈非指此爲弱淵與蓋弱水散漫無力不能負芥投之則委靡墊溺及底而後止惟皮舡可渡其間一渡名娑夷水廣盡一矢用藤爲橋極費工力以水沙不可施柱故用藤橋也流沙通典謂在沙川西八十里其沙隨風流行大抵西北之地多是沙磧史書所謂河沙諸國佛書所謂沙界恆河沙是也沙則水滲而下如沙州以西山北之地卽連流沙弱水滲其下山南之地卽連蒲昌海西域二河潛其

中王元章云山東孫氏子自少爲兵嘗乘皮船以渡久之又船行至南詔蓋軍人不知典籍此非但渡弱水而西又循黑水而南矣又嘗問西域賈人識流沙否曰識之非惟沙流石亦隨之流也

導黑水至于三危入于南海

漢志黑水出張掖雞山南至燉煌過三危山張掖今甘州燉煌今沙州也按黑水出雍之西而南入于南海爲雍梁二州之西界蓋出崑崙之南谷也自積石西傾岷山青衣岡脊以西諸水

天竺以東諸水皆入之故黑水諸源亦非一唐
樊綽云西夷之水南流而入于南海者凡四曰
區江曰西珥河曰麗水曰瀾浩江其曰麗水者
古黑水也三危山峙其上程泰之以爲麗水迤
小其所謂西珥河却與漢志葉榆澤相貫廣處
可二十里又漢滇池卽葉榆之地漢武初開滇
池其地有黑水祠乃蜀之正西北距巖昌不遠
巖昌卽三苗之種又與敘于三危者合履祥按
二氏所考諸源非一其實則合而爲瀘水沈存
中謂夷人謂黑爲盧別瀘水卽黑水也蠻中固

有西珥河亦有東珥河東西二珥者皆因諸蠻而得名安知其不指正流爲西珥也唐以漢永昌故地置姚州有西瀘蓋唐旣以馬湖江爲瀘故遂以姚州之瀘爲西瀘而雲南之地又有瀘南縣諸葛孔明征南中五月渡瀘卽此水也但兩漢志以瀘爲温字從省誤後人失考爾故東漢志謂黑水祠爲温水者卽此瀘水也今按西南夷圖西珥河北合龍德河中合印鴻川南合導江川其印鴻川東過葉榆之水又東合流名西珥河過滇池則黑水祠在焉東南與麗水合

而區江亦合于麗水者此皆黑水諸源也故黑
水經過雲南但名瀘水至交趾又名歸化江廣
如江漢合流處東南入海而海道圖自名黑水
口在大理國東南大理卽雲南也唐名南詔至
宋名大理云

導河積石至于龍門南至于華陰東至于底柱又
東至于孟津東過洛納至于大伾北過泮水至于
大陸又北播爲九河同爲逆河入于海

爾雅河出崑崙而說崑崙者多誕妄今不盡辨
而說具總論積石在今積石軍其下蘭州臯蘭

山石門黃河所出西南涵浸轉而東北流洮水
北流入之又北而湟水會星海諸水入之其祁
連山青海諸水出浩豐東流合于湟水皆入焉
皆崑崙北谷諸水也又北入北狄界中漸轉而
東至唐受降城折而南流爲冀西河大抵盤束
山碇之間千數百里禹載壺口治梁岐皆爲冀
河已見冀州故此不書又南至河中府龍門縣
之西山開岸闊自高而下奔放傾瀉聲如萬雷
是爲龍門南至華州華山之陰渭水入焉水勢
撞擊地名潼關折而東流爲冀南河至陝州陝

縣底柱壅河中流世傳禹鑿三門以通之又名
三門山又東至今孟州孟津河流始緩南北通
津謂之孟津東過今河南府鞏縣洛水入焉名
爲洛汭又東至澶州黎陽縣大伾山卽今黎陽
山也折而北流爲冀東河至今冀之信都降水
入焉今名枯降河是也又北至大陸說見冀州
又北播爲九河說見兗州逆河之得名以潮至
而水逆流也漢志作迎河謂迎接九河也亦通
古河入海之地蓋在右碣石自周定王五年河
始徙蓋自禹以前河決而北故禹播九醞潔以

東殺之至漢河決而東故并行於漯而沛亦爲河所并至宋則河決而南矣蓋古河北流既久濁流舊淤土膏日息則地形反高故河不復北趨漸次東決至五代晉漢時河遶梁山以東北入海至紹熙甲寅南連大野并行泗水以入于淮於是有南北清河之分北清河卽沛水故道南清河并泗水入淮今淮安之西二十里對岸清河口是也今梁山又塞而黃河遂西浸睢陽之境此古今之變也

鬲冢導濠東流爲漢又東爲滄浪之水過三澨至

于大別南入于江東匯澤爲彭蠡東爲北江入于海

嶓冢說見梁州漢水初出舊名爲漾至漢中爲漢又一源名沔水故以漢沔通稱然據書意則沔蓋褒水也又東爲滄浪之水今均州武當山之北四十里名滄浪州三澨卽泌河其一源名三家河又一源名三里河西南流至鄧州東南合白河清水河入漢是名三澨也又東南至今漢陽軍大別山而南入江是名沔口自嶓冢至此凡二千四百二十里東匯澤爲彭蠡朱子以

爲多句東爲北江入于海鄭漁仲以爲羨文意
禹治水之時與今不同方江漢未奠今江西諸
水壅遏不通匯而爲湖雖非江漢所匯而勢實
匯之史官追記固易差失而古書多是隱見互
見若先敘江而匯澤在江條之內似無甚失惟
先敘漢以及彭蠡而後敘江如此互見則首尾
橫決反爲失之中江北江想當時方言如此以
識江漢合流之別彭蠡源淺而與江漢竝列爲
北中南此恐亦當時東南之方言爾

岷山導江東別爲沱東至于澧過九江至于東陵

東迤北會于匯東匯澤爲彭蠡東爲中江入于海
江出岷山岷山數百峯大酉山爲最大雪山三
峯闖其後冬夏如爛銀山一谷名鐵豹嶺者有
西岳廟廟下名羊膊石江水正源也其西南分
一源又爲大渡河矣江至永康軍導江縣諸源
旣盛遂分爲沱東至眉州彭山縣復合于江江
南受青衣大渡馬湖江北受嘉陵江又南受黔
江出三峽而後東至于澧不書諸水以梁州蔡
蒙和夷潛沔皆互見而三峽天險非入都通道
計不施功故不書東至澧過九江則禹時澧自

入江而九江始入今則澧與九江俱匯爲洞庭而併入江矣故說者遂以澧亦在九江之數非也詳見荊州至于東陵今岳州巴陵也東迤北會于匯當特會于漢蓋江勢迤北處正受漢口若至彭蠡則東流久矣匯字必因上文而誤也禹於導江之功在荆爲多蓋荆地界濕沮洳江漢朝宗則揚自彭蠡而下不復致力矣

導沈水東流爲濟入于河溢爲滎東出于陶丘北又東至于荷又東北會于汶又北東入于海

沛出王屋在今孟州王屋縣西北始發源山頂

崖下曰沆水既見而伏東出於沛源縣湧爲二源東源周迴七百步其深不測西源周迴六百八十五步其深一丈合流至溫縣是爲沛水至懷州武德縣入河伏而南出溢爲滎澤東出于陶丘北則今曹州濟陰縣又東至于荷說見豫州又東北會于汶在今東平府中都縣又北東入于海今青州北海也沛水性沆勁太行爲河北脊其西水皆西流其東水皆東流沛出王屋本太行脊西之山而伏流以東南出及既入河又伏橫而南出至玉莽末沛入河不復南出而

河南無沛瀆榮自受河爲浚儀渠然沛則未嘗
不伏流地中今阿井膏膠爲性鎮墜能清濁水
吳興陳氏謂今厯下凡發地皆水溢蓋沛水過
其下也

導淮自桐柏東會于泗沂東入于海

地里竝見前章淮出桐柏初甚湧復潛流三十
里然後東馳亦尚滲其深處爲十四潭至并汝
潁滿禹時不費治導故不書豫之沮隋唐之汴
今之黃河皆入淮矣自桐柏至海凡千七百里
導渭自鳥鼠同穴東會于澧又東會于涇又東過

漆沮入于河

鳥鼠山說見雍州爾雅其鳥爲鷩其鼠爲鼯穴地三四尺鼠在內鳥在外孔氏書傳共爲雌雄張氏地理記不爲牝牡又其山一名青雀山渭自鳥鼠至入河一千八百七十里

導洛自熊耳東北會于澗瀍又東會于伊又東北入于河

說見豫州北方諸水雖大河亦冰惟洛水不冰所以謂之溫洛一是天地之中二是其北連山以障北風三則前人謂其中有石東漢都洛陽

以漢運火德故去水加佳爲維後世仍從水名
九州攸同四隩旣宅九山刊旅九川滌源九澤旣
陂四海會同

此總結平治之功也九州攸同者言九州之內
經理無間也四隩旣宅者言九州之外四海之
隈亦已安居也刊者去翦鬱驅猛獸興種藝也
旅者定祭秩立表鎮也九川凡九州之川不曰
通流而曰滌源者此所謂濬畎澮距川則田里
無水潦壅塞之患也陂者九州之澤有陂障無
潰決也四海會同凡水皆會同于海各得所歸

無復橫流也

六府孔修度土交正底慎財賦咸則三壤成賦中
邦

此總敘貢賦之典也府官府也六府水火金木
土穀之府也水土既平故六者之利無不興而
六者之官無不舉也度土交正底慎財賦此土
賦也咸則三壤成賦中邦此田賦也度土謂凡
山澤丘陵墳衍原隰之土交皆也謂皆物其土
地之所宜以任土事也底定慎謹也謂定度土
之所出謹財賦之所入則任民所宜貢土所有

不強其無不盡其有也則等其土田爲上中下而各定其什一之賦也中邦中國也古者田之可井者則整齊經理謂之中國其田不可井者則隘塞之地疆以戎索故有九州內之夷狄蔡氏曰土賦或及於四夷田賦則止於中國也

錫土姓祇台德先不距朕行

水土旣平田制旣定於是修封建之法各使守之錫土者賞其功勞定其限制也錫姓者表其勳德輯其分族也封建之來固久經洪水之患則限制多不明有水土之功則庸勞所宜賞此

所以修封建之制也當曉堯舜在上封建雖非
禹所專而實出禹所畫所謂弼成五服者此章
以下是也台朕指禹也如春秋我魯也禹既任
天下之事則率屬倡牧儀刑百辟者固其職此
所以祗敬我德以爲率先而其所行諸侯自無
所違距也周公謂作周乎先是也

五百里甸服百里賦納總二百里納銍三百里納
秸服四百里粟五百里米

此節以下太約言遠近征役朝貢疆理之宜也
服事也皆所以供王事也五百里甸服自都城

以外四面各廣五百里商周所謂王畿千里者也甸田也千里之內天子所自治是爲天子之田而畿內百姓所供事也賦納總者其賦則禾連稟束之以納也禾以爲糧稟以茨屋以餉國馬以爲薪芻凡雜用也銓者刈其穗也若今刈粟刈黍者惟刈取其穗也其工省於總矣秭稟也服役事也謂輸將之事也有穀曰粟無穀曰米總納繁重故惟百里之內納之若二百里則去總而納銓四百里遠則簡銓而納粟五百里又遠則去穀而納米近者重而遠者輕重者粗

而輕者精賦皆什一力則以遠近爲輕重爾古
人九數有粟米均輸二法蓋本於此然獨三百
里之民納橐而不粟視它處爲甚輕而有服役
之事焉服役獨在三百里者蓋酌五百里之中
爲轉輸粟米之賦也史記謂古之善賈者百里
不販樵千里不販糶以其遠而重也然則聖人
賦民必不使之四百里而負粟五百里而負米
矣故制爲田賦自百里而止於二百里焉乃若
四百里粟五百里米不言賦納蓋不遠納於帝
都亦行百里或二百里而三百里之民轉而輸

之於都爾夫三百里之民受遠郊之米粟而爲
轉輸力苦勞而賦則省又以見古者賦役不兩
重此帝王之良法而後世之所可行者也

五百里侯服百里采二百里男邦三百里諸侯

甸服之外四面各五百里爲諸侯之服侯維也
所以維衛天子也一曰侯后也爲民羣后也采
朝廷公卿大夫元士食采之邑也甸服千里固
不以封而凡公卿大夫之邑亦取於侯服則千
里之畿天子專之後世不然故天子之地浸弱
男邦小國也諸侯大國也內小國則弱有所依

外天國則內無所逼而外足以禦蔡氏曰甸服
分爲五等侯服分爲三等外諸侯分各二等

五百里綏服三百里揆文教二百里奮武衛

侯服之外四面各五百里爲綏服綏安也內則
侯甸外則要荒而綏服當其中故取綏安之義
內三百里揆文教所以接華夏之教以撫要荒
外二百里奮武衛所以禦要荒之變以安華夏
優文險武又有深意然內三百里揆文教則自
此以內凡有國者文教可知外二百里奮武衛
則自此以外凡有國者武備可知

五百里要服三百里夷二百蔡

綏服之外四面各五百里爲要服要如裳之有要也所以綱統四裔也舊說要約也其地遠於畿甸雜於夷狄雖州牧侯伯爲之綱領控制而其文法則畧於中國矣又於其中分三百里爲夷二百里爲蔡夷者易也取簡易之意蔡者放也如蔡叔之蔡有罪者則蔡於此焉

五百里荒服三百里蠻二百里流

要服之外四面各五百里爲荒服此爲四遠蠻夷之地田野不井人民不多故謂之荒所以經

而焚之者也此禹貢分敘所以先於刊定諸山
總敘所以先於導山是也禹曰予決九川距四
海濬畎澮距川暨稷播奏庶艱食鮮食此禹功
之中孔子所謂盡力乎溝洫者也此禹貢分敘
所以定川澤辨厥土等田制總敘所以有導川
則壤成賦甸服等事也蓋禹之治水不但疏決
河患鑿阻濬川而已凡天下平土皆制其井畝
疏爲溝澮以達于川所謂畎澮者卽田間之畝
一同之澮也所謂溝洫者卽一井之溝一成之
洫也則是井田之制自禹定之此禹中間功庸

最爲周密至於所謂懋遷有無萬邦作乂所謂
弼成五服至于五千外薄四海咸建五長則禹
功之終也分敘之浮于某水達于某水總敘之
六府孔修度土交正迄于四海皆是也或曰書
曰洪水滔天旣曰滔天矣則禹之治水若何用
功耶曰滔天云者當時方言形容其勢耳愚昔
聞之家庭曰洪水滔天卽如後世淫雨大水河
決之災但堯末年連歲有此然洪水之變多在
水潦旣降之後秋水時至之節而禹之疏鑿則
在其間水泉縮退霜降水涸之日爾或曰禹之

治水固先冀都而充青徐揚次第先及何也曰
朱子有言洪水之患河爲大禹之用功於河爲
多且以後世證之漢時河決東入青齊西被梁
楚南溢淮泗宋朝前後河決亦然至紹熙甲寅
以後尤甚遂分爲南北清河而南清河遂并泗
水以入淮而患始息河患所被大率古充青徐
之境也緬想神禹導河載壺口治梁岐關龍門
疏砥柱淤大陸播爲九河使之北流醜爲涕淥
使之東殺又通于河泗使之甚則可以南泄是
以冀充青徐次第皆平至於揚荆則以江漢下

流水所澤聚而揚爲尤下亦不得不次第先及
豫雖近河而自太華轂函以東至于鞏連山以
爲之限但滎河在其東偏耳河旣導則伊洛不
勞而入梁雍諸水之源計不甚用功所以獨後
乃若正疆理物土宜定井地濬畎澮經貢賦同
風化則無間也或者又曰古今有變更山川無
消長而禹貢地理有與今日不同者何也曰是
固不同也有人力之變者汴之通河淮潛之通
江漢是也有名號之變者九江洞庭之異名敷
淺匡廬之異號外方陸渾之異稱諸若此類多

有不可究詰者是也但江漢同歸而分爲中北彭蠡諸水而指爲漢匯此則尤有可疑者予已釋而辨之矣抑蓋有天地自然之變者如河徙而南涉涸而淤而冀兗青豫徐之支流水澤皆易其源委甚至九河淪而爲小海碣石陷而在海中此尤其變之大者也大抵天地之間山陵土石自有消長顧其消長之數甚長而人之年壽有限則不及見其消長遂以爲古今有定形爾山與土石且有消長而況水平昔沈存中奉使河北邊太行而北山崖之間往往銜螺蚌之

殼及石子橫亘石壁如帶謂必昔之海濱今東
距海已千里以愚觀之此卽昔之河濱也所謂
自東河至東海千里而遙者也夫以昔之河濱
而今在山崖石壁之間卽河日遷山日長石日
凝益可知也此皆天地之間今人尚可考見其
類非一而人鮮不謂迂者朝菌不知晦朔夏蟲
不可語冰其斯之謂矣然則禹貢地理古今之
不同又安知其非天地之變遷消長若河碣之
比耶或曰條列之說如何曰予嘗疏於前矣王
鄭分每章爲條每段爲列可爾若指爲山勢之

脉絡恐未然也夫天地常形固相爲句連貫通
然其條理亦各有脉絡若以脉絡之可見者言
之崑崙四垂而爲海天下諸山皆起於崑崙而
崑崙無定名地之最高山之所聚江河諸源之
所出卽崑崙爾崑崙之山綿互糾繆句連盤錯
其南爲岷山最大其東北爲積石諸峯其東爲
西傾朱圉烏鼠諸峯其西北諸山尤爲綿互紛
錯河之所以北弱水之所以西黑水之所以南
皆是也惟江河渭漢行乎中國自崑崙而東北
言之則自積石而北爲湟水星海青海以至浩

壘皆河源也入匈奴以東爲陰山又東南自代北雲朔分而南趨爲北岳以至太行是爲河北之脊壺口雷首太岳析城王屋皆其羣峯河之折而南汾晉諸水之所以西入河涿易寇漳恆衛之所以東入海也分而東趨者行幽燕之北爲五關之險以至營平而爲碣石此北絡也自崑崙以東言之則東爲西傾而洮水出其北入河恆水出其南入江又東爲朱圉烏鼠諸隴則爲渭之源白渭源以北卽夾河源而北以東若岍岐若荆山諸峯涇水漆沮諸源也自渭以南

卽西傾而下諸峯互爲終南屹爲太華東北爲
殽陝東南爲熊耳外方嵩高伊洛之源又南爲
桐柏淮源以達于淮西諸山此中絡也又自西
傾朱圉而南分是爲嶓冢漢源夾漢而趨者北
卽終南華熊諸隴南則蜀東諸峯說者謂蜀東
諸山皆嶓冢正謂其岡岫綿互爾又東則爲荆
山內方此中絡之次也自崑崙之東南言之是
爲岷山江源夾江而東者北支卽西傾以南嶓
冢以西之脉爲桓水西漢水嘉陵江諸源其南
支卽南趨爲蒙蔡諸山青衣大渡馬湖江諸源

又東包涪黔一盤而北爲三峽其東出者包絡
九江之源中盤中爲衡山其再盤而北爲廬阜
其嶺之東出者又爲袁吉章貢盱信諸江之源
至分水魚梁嶺三盤而北趨過新安時天目盡
昇澗凡再盤之間其水聚爲洞庭三盤之間其
水聚爲彭蠡三盤以東則南爲閩浙北爲震澤
此南絡也惟泰山則特起東方橫亙左右以障
中原此所以爲異與大抵水者山之液故山盤
而水之源出焉此所以聚爲川流之盛地道以
旬連爲固故山東而水之流壅焉此所以資於

疏關之功凡此其大約云爾或曰古今天下廣
狹一也禹貢五服四距五千里而周制九服自
王畿以外每方自爲五千里何也或謂尺有長
短則周尺不應半禹之尺或謂禹五服之外外
薄四海不在其數周則盡外薄所至而經畫之
此說爲近然亦不應外薄之地與五服之地相
半也攷之經文甸服方千里而曰五百里則凡
所謂五百里者舉一面計之也若周官則曰規
方千里曰王畿又其外方五百里曰某服則舉
兩面通計之也是則禹貢所謂五百里甸服者

乃千里而周官所謂外方五百里者乃二百五十里也至漢地志又言東西九千餘里南北一萬三千餘里則漢東西視禹貢幾一倍南北視禹貢幾二倍然攷其所載山川又不盡出禹迹之外何也古者聖人制數周密其制方田之數以御田疇廣狹制句股之數以御遠近高深方田之制行則自井畝徑遂之直積而爲道路川澮截然直方無有迂曲故中邦之地雖廣而里數則徑自秦漢開阡陌於是道里始迂遠矣此古今里數多少之不同一也周髀之經曰數之

法始出於圓圓出於方方出於矩矩出於九
九故折矩以爲句句竇三股修四徑隅五禹之
所以治天下者此矩之所由生也是則句股筭
法自禹制之蓋積矩以爲方田而句股以測高
下淺深遠近此禹之所以疆理天下而彌成五
服者也句股之數密則於山川迂回之處與道
里曲折之間以句股之多計弦之直而得遠近
之實大率句三股四弦直五以正五斜七取之
自秦漢以來誇多務廣固盡外薄之遠其計道
里又但以人迹爲數不復論句股弦直故漢之

九千里太約準古六千五百里漢三千里準古
一千九百七十一里而尺步長短之異制又不
在此數此古今里數多少之不同二也至於禹
貢外薄之地在五服之外而後世斥候所到盡
在里數之內此其多少之不同又不待言者或
者又曰冀在九州爲北堯都冀州則自甸服之
外北短南長五服之地北無所展而南有所棄
則如之何曰隆古都冀政教四達則冀北之野
生聚教訓必不如後世之爲窮漠所以冀賦爲
九州第一而水旱之後分爲幽并其廣可知兼

堯都平陽雖曰在冀自平陽以南渡河至陝於
今地理三百七十五里正五斜七於古蓋二百
六十餘里耳則是甸服之地自跨冀豫冀山兩
豫平緬想當時甸服之地當亦如周室王畿之
制蓋成周之制雖云規方千里以爲王畿然西
自邠岐豐鎬爲方八百里東則洛陽四達方六
百里總爲千里爾五服之制其間絕長補短計
亦如此何則周都豐鎬西至犬戎約餘千里而
犬戎之地自爲荒服先王之制賓服者享荒服
者王自穆王以犬戎地近責其從賓服之享自

是荒服者不至則是五服之制計古亦有因地而爲長短者蓋諸侯之分特以爲朝貢之限制亦有在近而視遠雖遠而視近者大率地有廣狹俗有夷夏未必四面截然如此正方聖人立爲限制之經於中固必有通變之義讀書者不可拘於一說而不知聖人體用之大也

光緒五年歲在屠維單閼吳興陸氏十萬卷樓重雕

陸心源校